

四庫全書

集部

欽定四庫全書

集部

清容居士集卷

十八至二十

詳校官庶吉士

臣張

溥

侍讀臣孫球覆勘

總校官降調編修

臣倉聖脉

校對官中書

臣

宋枋遠

謄錄監生

臣

杜羣玉

欽定四庫全書

清容居士集卷十八

元 袁桷 撰

記

慶元路鄞縣學記

粵昔授受緒絕空虛固陋之學淪於人心言理者人人殊師記問者質而不化詞章篆刻決裂六藝糜爛而不
可救師儒有憂之據道德性命之要毫分縷析鑿鑿乎

其不可相素也繇是士得以一其視聽皇王之道復興於千數百年之後可謂盛矣世祖皇帝混同區夏崇學校定國子學成憲皆東南儒先而朱文公所說咸取以爲經史模楷於是窮微絕域中州萬里之內外悉家有其書然而急近功者勦取其近侶以爲口耳之實天人禮樂損益消長切於施爲所宜精思而熟攷者一以爲凡近迂緩而不講至於修身養心或相背戾而不相侶則緣飾儼默望之莫有以窺其涖際夫明絕學以承先

聖之統可謂難矣弊生於荀易守其說而湮其本將不勝其弊載籍極博莫嚴於五經教人之法莫詳於三物揚子雲云丘陵學山而不至於山惡夫畫也鄧舊有學王文公安石為宰時延會稽杜先生醇教之學者輩出至大二年郡大火學燬之主邑之學曰孔文雋董儒金始建講堂禮殿未及完而去皇慶二年三衢姚熙載實來是歲天子下科舉詔同知郡事吳郡張侯某顧瞻陋蕪首曰其何以稱上意迺率郡官而助之邑令梅君遇

春丞簿龐君滋范君祐咸曰吾長於是茲役曷可違嚴
工庀程戒隸業者咸輸以佐閱二年夫子像成侑從有
叙門廡庖廔塗墍繚繞之屬堅密精潔學宮之制完且
具矣姚君迺曰鄞號多士昉杜先生宜作先賢祠以祀
鄞士之興其自今始乎嘗謂學校宮室殿謁循行風俗
之使者未嘗不督厲修繕獨教法未定雖聰明自任猶
不敢高下以議今明詔四出郡侯首創其原姚君又能
推本前人尊師之旨深有所寓棟雖官朝廷因姚君之

請知張侯之美遂以學校之弊首叙其說庶幾吾里秀士強敏自修詢考者哲篤行於顯微內外之實文質交資上承詳延將以復乎昔時之盛則姚君之闡微其意深矣庸刻於石願有以俟焉

鄭山書院記

粵若古儒先各以方國所尊祭於學社自漢而降定孔子祀餘悉徹廢今百年來始有事于先師其居邑講習治官游衍之地崇闡相望或者病焉夫氣流六虛神而

存之聚者易推遠者難窮聲音笑貌之感若將企焉如
弗及者理有在也合吳越楚蜀之地咸尊以師惟朱文
公世祖皇帝一海寓定胄子學取文公訓註為學制郡
縣益遵守而祀於江南者復得推行大德二年四明趙
壽家儒科慨然請於朝曰伊吾祖鄂州善待從文公游
今天子興是學願割田別居以祠而名曰鄮山事甫下
趙氏即世七年三山林德載氏奉命祇事屋毀弗稱旋
辟田沒不可問覈故整圮實完實成莫薦齋明陟降儼

肅賓老佐祭侯伯合餽又三年俾繫其事於石俾桷曰
維我四明薦紳先生辨釋著微實相表裏源同流分塗
殊轍一合私而惡異標榜之弊也炳然尋訓理何外焉
學以殖身德以敦本斯道立矣孰空說以為證弊不勝
舉惟性與道匪言是夸桷懼茲久願相與勉焉林君精
敏慎修宜展於世文公之學不墜審由是也大德丁未
春後學素桷記

鄞縣興造記

鄆為縣延亘三百里環山帶江西為沃區其民盡地利
近東瀦為湖土廣而俗雜逐島嶼魚鹽之利出沒於海
上歲千百數林藪川澤之隸於鄆者不假於外故號為
劇邑邑復輔城以居尤為難治縣上事郡署曲直縱舍
承指意一不得便輒指撻辱撓關臨相通縣勢始振後
凡為縣者率用是自治而民益困矣大德七年師府始
移鎮控扼水陸衆曰郡有二府縣益不可理八年真定
盧廷信氏丞于茲推勤服廉沈斷靜修罪䟽於囹訟辭

於庭暮月而郡侯尊焉大府任焉邑之讞咸質以定
旁郡之賕悉檄以正顧瞻四周令主簿是謀先時縣燬
經始陋庠不足廣迺撤而新鳩材于山負者以競輸役
於徒民以不病首於臺門廳堂亭廡凡五十餘楹智周
而勞簡噦然以深翼然以容謁者趨者視聽易慮於是
耆艾譴然以謠曰伊丞之來吾民不知吏儻既荒吾民
相忘彼庭開明維丞之平雍雍其堂富民恐傷有亭是
休思賢悠悠丞之戾止勿譁以喜後兮今兮維今是侶咸

謂桷嘗職太史筆削無避溢遂不得讓役始於乙巳之十月越明年成承嘗為行掾中書有吏能令長忻都次為東平周汝弼氏簿澄江朱申氏也余愛其成紀以示後俾知鄞為可治大德十年十二月日素桷記

西洛書院記

河南薛公遵先君子之命建義學於永寧矣龍頭山有故跡焉蒼崖嶄然宋元祐中天台羅適正之大刻其上曰洛書錫禹之地正之安定胡先生門人善水利所

至通陂埭屯田之美按地志永寧併長水縣長水東臨
洛川記傳云洛書所出今龍頭山新立禹祠而薛公仰
止亦近得請於朝為書院遂更其名曰西洛且俾夫後
人知禹洛書之誠有自粵昔九疇垂象示文夸誣相矜
祖緯襲符漢世明經之士汨於休咎莫窺其真厯千餘
年儒先大興闡天人之祕方圓相通正學以明然同黨
之說勝一以為已是一以為傳授數精理湮皇極之建
卒無以大通民有恒性君師作之以修以綏如彼北辰

樞紐運行內靜若動莫窮其化凡厥有生極迺固有性者為聖復者為賢作而新之維后是訓庸保其極則民永以久保極者民作極者君運而制諸若几之在握輪之在御皆聽命於我孰先後焉孰終始焉四時萬化之理繇是而備謂之攸叙夫豈捨已而隨彼也昔大禹佐理水土攸平君臣交修抑亦有定制洛為天下中碩儒訓傳家有其書慎厚遜讓猶有先王之遺風陞西洛之堂者當慨然以思謹其執中將見夫作人如新之驗由鄉

而達於邦國勵之翼之示諸於掌皇極之訓其效可成也薛公名友諒溫密有文今為翰林直學士推先志之私淑煥而廣之為屋凡若干楹又將延師以教後之學者而屬筆於楹故以普之所聞者著為之記

建城夫子廟堂記

景城縣東南三十里有故城焉曰建城漢為中水縣地金大定中以其地北臨濠沱南薄御河徙縣於今所二水交流名之曰交河焉皇慶元年保定王君領縣簿事

循河故堤水落冬月先期率民以補其缺顏霖雨時至
則因其防而巡督之河不橫流政簡民佚觀風省俗聿
來於茲望其井屋聯屬誠阜且康於是士林之秀曰劉
國芝耆老韓昌等言曰建城舊有先聖廟城址日圯而
廟莫敢廢在昔許文簡公安仁嘗撤而新之未幾金亡
居室燬蕩而獨巋然以存至元戊子國芝之父禎遂易
於文簡公之故居以詔於里士絃誦之聲家至而日化
矣王君周旋里門念崇而新之於是治書侍御史張侯

完以書來曰吾里夫子廟易代有存許劉儒先作新之
志子盍廣諸敢以楮幣若干為里人勸於是下令輯工
奠方闡基表植巷道庭宇邃嚴以丹以塗論講有堂游
息有廡明年率其儒生落而祀之迺介刑部員外郎葉
蘇君俛志其事粵自塾庠序學之制不明而士無所於
學州縣有學率歲時奠祭貿貿道途謹修其故常於造
士乎何有成周之學備四代而畿內為序十有二為庠
三百左右之塾復不預焉噫先正教學之興何其盛也

學必釋菜於先師虞庠為鄉學有堂有序得行釋菜之禮記禮者之言也釋菜於廟則自魏晉始也遵古之學從今之禮損益之變不亦可乎且鄉校不毀鄭人美之今天子下詔明鄉里選舉之法建城之學者由是而陞司徒者將皆敦讓重厚敏者謹其藝能恂恂于于仰止昔賢舉不絕書而王君化民成俗之美庶得以傳於後王君以習國語始為樞密院從事名果治縣有法類是

封龍山書院重修記

世祖皇帝以盛德深仁正位纂圖越二年始立翰林院
真定李文正公首以碩德耆壽俊召為翰林學士未幾
告老以歸隱於封龍山封龍在恒山之陽公幼侍東平
府君受業焉地舊有書院兵革蹂躪公拮据盡力以成
之故其居朝廷也食息不忘茲山天子察憫其志俾食
致政之祿以終老於是公作新斯文遠近之士咸秀出
暨公下世踰二十年其從公而顯者曰史忠武公諸子
曰杞曰闕曰輝廉訪使荆幼紀集賢學士焦養直廉

訪僉事張翼宣撫崔某其餘贊成均授鄉里名不能悉數而真定之學者升公之堂拜公之像未嘗不肅容以增遠想也皇慶二年其曾孫慎言為翰林屬仁宗有詔省掾用儒士擢入佐左司院中選都事僉曰李文正公為翰林肇端其曾孫宜以居未幾拜監察御史而於封龍也惓惓悉如公之志歲久蕪漶不治往至治元年為司農屬時請於司農符下其道廉訪丹漆木甃悉撤以新御史有言曰繼述志事子孫所謹我先公之為茲也

實將以佐國家之盛願子記之稱曰致太平經濟之道
章句佔畢不能以盡也文正公恬於進取率躬以化其
鄉耄至而辭祿德之本也導掖其秀民仁之至也其徒
卒昌於時孰不曰文正公所作成也今遺書具存在於
書院者宜究其委源考三代之所以長秦漢之所以失
反躬以思平治之道如指諸掌將反覆以陳於上李氏
世守家法則書院永永代有嘉譽其繕修也益廣於
今日矣本末具前記不再書

慶元路醫學記

醫之書作於上古乎後人猶疑焉陰陽氣運之說與易書禮相昭合蟲魚草木之精詳於詩尤近之然其辭義奧古卒莫能通曉非專治者不能也先王知之始為之師以教之後復立學以長之生人之本繇是備矣至元壬辰長濟南陳公祥為肅政廉訪副使來四明遵詔旨立醫學學成甫十有八年燬焉其地近市狹紊咸病展事鄞縣西有故主簿廳事基及傍近地蕪礫不治於是故授

徐君源道等請於郡遷以廣之迺斤其舊地得財若干以治土木郡侯完顏公首為之勸推官賀某贊補其役隸於醫籍者胥率錢以輔之逾年而學完殿廡翼成軒閣深靜會予自京師還里屬記其事余幼嘗聞長老言鄉里多名醫皆修謹退讓訥訥然若不勝衣察脉視色必原於井谷經絡之微眇調製湯液必通乎風土之宜甘辛燥濕內外相為表裏者悉參取於經傳故其術百不一失懷疑審問求正於勝已無忌憚之謬道同而氣和

相遜以禮相處以義而昔時公卿家激厲獎與之道又能使盡其術而無愧噫亦盛矣今皇宇恢廓五方士民參雜乎州里拘而不達將不勝其弊率焉以僥倖懼其深有所失也徐君世儒醫教授是邦今二十餘年重靜而不撓昔之所聞徐君深知之廣天子好生之德諄諄然語之使後之學者誦其書毋執一以自滿虛心遜志復昔時之長厚不幸罹於疾病將得盡其順受無夭閔之害則徐君之教不亦闡乎余歸田里尚幸而有見也

白石書院記

釋奠先聖先師定著於祀典而鄉社之所宜祭皆廢不舉宋初肇建四書院釋奠釋菜之禮悉遵令甲若鄭玄所言高堂生毛公制氏之徒皆不得專祭僅列於從祀濂洛之說行於是先賢之祠競立首於其鄉復推其居官游歷之地甚者謂其觀風宣化雖其足跡之所不至亦當有祠夫古不墓祭謂其神專於其居室也又曰不歌非類謂懼其瀆而不正也今郡縣朱文公祠最廣各

慕悅胥勸終莫能有病之者繇是空巖海嶼屹然竝立而入仕者偕是以為資歷何先賢祠祀先後盛衰之不同也朱文公之高弟曰黃文肅公天下尊之曰勉齋先生其學以持敬為先探微鉤深以極夫操履之實懼其守之不專則蚤夜以思斂其粹精絕其枝蔓正誼明道見於經濟故其臨川漢陽之政惓惓於征繕獄訟而論者始不敢以儒為侮守邊議戎衆皆咎時宰用非所宜而公益得以據其素講事至而不懼政成而不迫是則

儒者之效惟先生足以及之先生嘗曰吾於江東之友
得三人焉曰李敬子胡伯量蔡元思時廣信之儒先劉
君養浩蓋獲登其門朝夕習益悉以先生之指授者為
標準寶慶元年入太學舍法成淳祐七年授寧國府教
授後進之士從劉君者無虛日相地於白石山為精舍
以處學者祥刑使者建安蔡公抗扁之曰白石書院蔡
公之於文肅皆文公之門人從劉君者悉稱為白石先
生天運合一白石之子也嘗安輯其齋廡因曰先君之

承先師曷敢墜替誦聲屢武益廣其舊後為湖廣儒學副提舉以歿有子曰光復慨然曰大父師友之傳不可以不垂久遠文公祠遍江南祠文公則文肅道得以尊久遂買田築宮中為禮殿書院之制悉備殿北立文公祠以文肅侑食後立大父祠繇是傳授之旨益信所隸有司上其事於中書省省允其言始定置山長入選調既成俾桷書始末著於石章噫文肅文公之忠臣也疑者補之異者同之不以一時之辨爭而立其黨與見於

成書故其匡輔之功若文公之於程子今之尊文肅者能若是斯得矣光今為史院編修官敏達知治體文肅之學是誠有望焉者也

昌國州重修學記

青社韓侯莅是州踰年顧瞻學宮頽圯日至喟然嘆曰化民成俗必自學始爰相厥攸鉤稽負逋治其島祖壑其間田究整是先泰定元年十月甲子役興用工二千有八百計緡錢二千有五百匠石日食之費則諸生欣

輸以佐於是殿堂門廡齋庖池徑咸得備具謂桷繇翰
苑歸併記其事桷嘗聞之先儒以明理為綱領譏詆漢
唐不少假濂洛之說盛行誠敬忠恕毫分縷析一以體
用知行槩而申之繇是髫髻之童悉能誦習高視闊步
轉相傳授禮樂刑政之具獄訟兵甲之實悉有所不講
哆口避席謝非所急言詞之不工則曰吾何以華藻為
哉考覈之不精則曰吾何以援據為哉吾唯理是先唯
一是貫科舉承踵駁駁乎魏晉之清談疆宇之南北不

接乎視聽馴致社亡求其授命死事率非昔時言性理之士後之學者寧勿置論而循其故習者哉昌國惟四明海中州士之興起自紹熙始著樓宣獻公袁正獻公楊文元公尚書深寧王公嘗記其建學論堂之本始揚雄有言曰百川學海而至於海善喻者也首之以訓詁之精次及夫名物度數之密由小成至於大成非積年不能以至周官鄉三物之教詎止執一而以為傳道之要殆不可也委流安行由蹇而達訖歸於海學之功也

侯名搏字仲舉既興其學迺復儒役以為大比之勸學之士子寧不自勵敢執筆以俟是役也州之長某州同知黃棟孫判官張信吏目陳益學正孫恕皆叶贊其事泰定二年二月癸卯具官袁桷記

昌國州醫學記

醫之道即夫人身以備三才其說與易箕疇詩禮相表裏亦大矣哉蓋昔之君師聰明神聖因夫五行以寓於五常之形氣致坎離之用以合其陰陽推其運行以齊

夫寒暑考九州風土之宜別溫涼燥濕之高下蟲魚草木
纖悉備具非博習廣聞者不能也至於七情既發之偏必
求其中以返於正皆吾儒傳心之極論有察於聲氣臭味
之眇忽考之於遺書受之於家庭積歲年不能以竟而掌
政令者從是稽其醫事以制廩祿是則寧有天閼疵癘之
憾也哉南北地氣有大不同而為之醫者各執已論近者
急於好尚而恣縱不能商度十失五六誠可罪也秦漢之
主卒望海求不死藥藥詎能令不死蓋其空巖絕島磅礴

於巨浸之際絕囂塵接雲霧靈根異草得地氣之正方
外隱士時採其奇絕精良以療治輒奇中而功倍今所謂海
上方皆其苗裔而昔之集方論者復蒐類於蛟龍之窟穴
海於天地間號寂鉅焉得以有遺也昌國為州四履皆海
至元二十九年始立三皇祠綿絕不稱韓侯治儒學既竟
復莅醫學茲曷以奉揭虔廣其故址而二倍之泰定元年
冬十月正殿成復立論堂翼以東西前為儀門外為神門
廊廡有序祠象儼赫首以主祖勸民胥成不三月咸樂以

助復遵詔旨為惠民藥局工既畢書來俾書其事於石
稍嘗謂疾痛疴癢切於吾身者猶民之身也民困魚鹽
侯能紓之儒病微科侯能復之既憂其生又懼其罹於
疾病使夫習為醫者講肄以精其術故余歷叙醫家者
流其學實難三聖之書昭然具存反覆紬繹皆得以完
其生是侯仁政之本愈遠而愈不可忘也

定海縣重修記

定海為縣自昔號重地鎮遏戍守異於它所南受諸蕃

絕域之颿舶東控島夷不庭之邦商賈舟楫噴薄出沒
據會濟勝實東南之奇觀也皇元考圖受貢益倍於異
代信使香幣渡海歲不絕縣令將迎日疲於供事視公
字若傳舍歲益圯剝至治二年忻都君始莅事曰吾受
天子命長邑於是失撫字則奚以仕歲適大歉徵租於
民將不勝逋負計歲所入一萬有奇遂覈其實止輸奇
於官鹽賦歲不登民益以困卒請而蠲若干嚴飭官驛
置隸人以候過客而復其役久而曰吾將治所居以聳

民視瞻一撤以新為楹五十餘瓴甃木石丹漆箭鐵皆
堅緻可永久教諭蔣君昭先列其行事俾為記余謂治
縣莫先於宜民承上意而不鳴其疾苦甚者增羨以求
媚善譽乎何有縣當水陸之衝輒默計歲月得解職即
謝去植仆舉弊終其身未能也若是則忻都君之行事
汲汲慕古將有以大其所為夫豈苟計目前之功效者
哉余特記其興造使來者有攷蔣君所述多善政不復
著推其所為舉綱以遺目盖可知矣是役也尹曹敏中

主簿薛炳悉力贊治故迄用有成

新建鄞縣尉廳記

郡治絕江其地名甬東吳王居甬句為古決口號甬江
在今海濱海達於江入於奉化西醜於餘姚縈紆回曲
綿亘百餘里鄞為縣分東西以浮梁為界東之民習網
罟魚鹽以自業其地膏沃有湖可以灌浸率不善墾治
春至輒率其子弟身擢歌出沒於海島伺危薄險對
面成姦宄憲令昭著至死有所不避尉以巡督為職自

宋雍熙間置尉治於彼蓋重其地以鎮遏迄今數百年
游手益夥捕繫無虛日廨燬於兵踰五十年尉率其兵
徒隨所寓無常地訊錄之所不具於觀瞻莫格其非而
任益以困矣至治三年廬陵周君一夔來視故址曰吾
不可不自重首為外門復為廨門中建廳事挾以賓榮
輔以吏舍後設燕居以休其勞清流匯池花木列植周
繚塗牖皆足以支永久吏有言者曰尉職在察盜圉
不立奚尉之為茲土之民俗弊已久嵯禁之嚴莫窮其

窟穴朝夕胠發累累旁午不有以居將曷能以有處尉
笑曰道德齊禮夫子之訓也獄市無擾相國之言也閱
數月獄以空告於是輿人有言曰尉之申申非取異以
求新塞其姦愾養其淳真彼疇鱗鱗良苗氤氲尉之去
兮將以告夫後之人役始於泰定元年秋八月成於二
年之二月郡人具官素楨記

浙東廉訪司重建澄清堂記

國家肇置肅政廉訪司浙之東以嫠女為總治而行部

使者凡六人獻審殿黜循歷於六郡總治之使二人坐鎮於婺六郡歲終必以其成績歸于總治定其可否以上於御史臺持綜覈之實執與奪之柄厥任實不輕矣夫以輿地之廣貢賦之夥天子不能以自治必假於守令焉守令不能以公其心又假於耳目焉以重其寄大其居室聳其視瞻廉遠堂高非直為觀美也聽事之所繇唐歷宋歲久頽剥不治至治二年中奉大夫馮公為使於是邦顧瞻改容曰茲不可不為先務邦之耄倪亦

曰茲實聽政之本於是郡請於中書行省計郡餘財以
為匠費崇其堂墮稍北以構柱甍孔新庭廡邃密名之
曰澄清復為燕居之室於其後曰迎華觀經始於是年
之九月明年五月告成中奉拜湖廣行省叅知政事以
去資善大夫思蘭公甫至則曰中奉公之惠後若是宜
紀其事未幾拜南臺中丞資政大夫岳烈公繼為使亦
曰是誠不可軼於是僉命桷為之記中奉資政嘗牧於
吾鄉皆得而接識往會中奉公於京師謂余曰民之多

寬繇循行者不盡其辭吾往浙東將使六郡之疴瘵亦
切於吾身後聞其所行果有所不避資政公廉而守正
牧民如已予遺愛於四明人能言之中丞公得見於會
通河議論冰雪以剌劾為已任是則三公之行事深有
合夫至公之論抑又聞之事患有所不明知而有所
舉藉藉於道塗之民口不可以防也苟明矣不少恕焉
則法舉而德不足以化今使者五人皆遴選在位於以
見聖上振整之初政登斯堂也則相與講習見於施設

不繇以避不苛以求陽煦陰肅吏民率服胥保惠以承
於上其治豈不偉哉夫志同議同任事同七郡之民孰
不鼓舞以嘯詠太平之盛柄舊職太史幕前賢壁記警
戒之實因以謏聞而為之辭

明遠堂記

澄清堂成紀興繕之本末矣叅政馬公奉聖天子明詔
巡行江浙復至婺女見其燕居之堂舊曰迎華觀者而
更其名曰明遠取其切於觀風之道副使馬公經歷祖

君冕復求記於余於是屬筆為之辭曰今夫七郡之黜
効悉萃於澄清吏抱其牘鴈鷺以進卒不敢妄議其可
否將求其生欲重其罰情皆不能以得也精思以究必
退省焉以品節之事窘於一庭而智足以見萬里古之
善馭吏者不泥於法律不事於朱墨故其革姦警讐無
言而化成必有其本也在昔聖人明目達聰百僚在官
定於三載之考績夫豈有他哉維東浙負山聯海風俗
不一强者雜諛詐柔者率罷軟撫摩之道各有攸處登

斯堂也必攝齊肅容悉議其所宜行退於燕居申申天
天燭照數計考七郡之幽隱如指諸掌名之曰明遠孰
曰不宜今叅政公之按行非家至而戶到也是則明遠
之旨講之熟矣則凡後之來者益得以省察俾勿壞泰
定三年四月丁丑具官袁桷記

新修司獄司記

國朝肇置司獄司專以掌守囚禁職卑而勞猥為其官
常憤憤不得志浮湛坐曹日數歲月希善代謁吏部者

每請託求免注繇是視為傳舍狴犴之不修桎梏之不
整所至皆是憲部審決亦有所不暇及簡漏相仍其勢
然也永嘉林君龍澤之來守是官也曰吾不可不自振
考其成牘剔疑擿姦重者上憲府輕者白郡守多有所
變易罪以不寃囚民宜之久之曰獄不可不繕營至大
二年獄既燬支敝植仆僅存其制於是除地撤瓦築堂
三楹曰平恕堂後燕室曰種德左右翼軒環以吏廡迺
築高門迺闢園土養疾有堂奉神有祠繚以瓦垣浚以

甘井取足備具各中繩墨蓋先之以已俸而官若民迺
悉為之助不旬月而告成噫亦難矣昔人言不卑小官
於林君見之州縣疑獄郡輒以委林君揣情以求其生
量事以正其罪羣吏抱案詣庭下無虛日是則林君之
果能令官大也書曰典獄非訖于威惟訖于富若是則寧
有私謁者乎余直集賢林君時為掾史處事立具今觀
其政績顯白足可稱道庸紀歲月是役也興於某年某
月成於某年某月泰定三年歲在丙寅郡人具官素楠

記

慈溪縣興造記

泰定二年冬十一月保定孫公楫循行四明至於慈溪
觀其縣治壯麗整密咨嗟徘徊詢諸縣人邑長為誰咸
曰此昔烏忠顯之所成也忠顯為縣首治董孝子祠以
化俗次修孔子廟三皇祠曰儒以長民醫以養民又治
社壇嚴其齋宿以謹水旱迺曰迎詔禮賓茲不可不虔
傳驛休息宜慎其寒燠興繕既畢始曰吾亦得以廣居

於是矣語未終孫公曰是誠可紀載於是命進士翁心傳為圖俾柄為之記聽事五楹高其前三楹焉堂曰清淳化中尹張叔達璽書之所褒因其名而築之者也挾以吏舍厨湑獄室縣門鼓樓前後有序縣治之後有小湖湖之中為洲花竹四列風蓮水柳映翳繚繞為亭以庥其居有四曰思政佐治以察民隱也曰柳意勝覽以樂其神觀也圖既畢復言忠顯之政墜萊輯亡役不病於民去其姦饕以為政本今其去十有三年思如一

日而其繕營足以支永久於是其有驗噫今之為縣嘗患夫土豪之控持也其始也利以誘之終三年更徵需歛散一聽其命戶稅更易拱手莫與之抗甚者為之囊橐可哀也已孫公之來茲邑也其亦有所感表去尹之美亦將以警夫來者余昔在太史觀循吏之實書以示後忠顯不求名而名自至孫公之為使者夫豈計目前以為黜陟哉始忠顯之滌篆也漫不可考謹視之實稱歸縣印言於攸司而更正之其精覈率類是則凡今之為

縣者廣使者之用心以成其政績柄雖老尚當記之泰
定二年歲在乙丑冬十有二月甲午郡人具官袁柄記
定海縣學藏書記

定海為縣南接蠻島汪洋數千里食息可至厥今號為
重屯四方語言咿嘵侏離交衢旁午褒衣儒冠見者皆
議考諸郡乘惟沈端憲一人嗣後接武猶班班可考泰
定二年春某官始來為令迺曰縣固有學學必聚書冥
行空言講習何補武城絃歌先聖是取進鄉小民首於

文辭其必自聚書始迺與主簿龐君首捐俸資復命教諭汪宗江出學粟俾儒職樊惟肖胡驥繇杭置經史若干卷又諭學之耆老曰經以窮理史以究成敗廣聞修辭惟子集是宜是亦不可缺復得若干卷將刻石列目以示永久謁記於余念昔在廩廬見令尹之兄在廡下察其儀貌莊肅知非凡近後果為進士第一見令尹于國學儀端語溫審其頡頏萃於一門今茲掌其邑尤以教學為己任抑嘗聞之聚書非難寶書為難校官之不

職悉資以奉權貴甚者竊其故籍挾之以逃其取甚者漫漶散落一不挂眼三者之病比比皆是今刻於石將杜其漸後之來者寧得不自勉乎

慶元路重修先聖廟記

河南郭侯視郡事之初首定役法郡民日困鹺事旬月按覈數嘗不登郭侯知其奸利迺言曰病在私商潛轉輸其所贏餘卒不入公籍民病不可藥也於是罷賈區分四廂俾總之鱣醢鼓脯各趨其時視計口之授畧相

等復竦然曰吾職司學校茲曷可少緩督大小學謹授
業斥其偽冒以其餘粟大修孔子廟於是進郡博士陸
晉之學正錄胡某毛某而言曰漢文翁立學歷唐宋
幾二千年猶完綴君等知其故乎少間曰教在不墜其
不廢在繕修迺曰若殿若儀門風雨剝圯在丹雘先聖
崇嚴列祀肅雖在作繪定章服在禮象又曰講有堂書
有樓吾亦曷敢後姑徐徐為之吾願俾是邦服習仁義
秀又林立遣詣王朝將自茲始桷繇禁署歸里凡三年

愛中和樂職之詩首為詩以咏贊侯名郁字文卿所至
官以興學為本詩曰

茫茫海甸聿仁義邦圭組積榮失其敦厖歲亦云徂夸
侈則降維侯之來靡癘不知曰維泮宮風化攸基竦其
具瞻象神之儀藻并繪櫨絢分承式降陟有嚴是奉是
翼匪土木之工職教攸則瞻彼戟門有飛戾止斯翬煌
煌五采屬纚鏘鏘八音粲曰在耳嗟爾後生無媿以誕
無逸豫伴與遵我侯度以靖以獻奉璋有戩伊侯之願

鄞縣學興造記

延祐元年楠記鄞學之興造矣甫一紀職鄞學者括蒼
林君傳以事狀來言昔之經度踰於舊址廩入不給故
其結構塗墍缺焉未周鄞之尹曰阮君周翰治縣未幾
有恪殿謁首以興繕為急割俸以勵儒生於是步履有
甃繚繞有墉礮以密石華以堊丹象設有嚴講席齋廬
足以稱絃誦而從祀一百有五悉易以塑合儒先之宜
祀者為祠以庠少間曰既完矣盍廣教以振士類立小

學師二人而增弟子員凡五十人泰定三年二月朔告
成復命楸記維鄞自王文公廷杜先生以君師為端本
故後之繼承經術淵懿蹇蹇大節見於史傳者凡數公
衣冠日隆微近功利而懷忠抱德盛於乾道淳熙之際
遺言正學傳於今猶未泯周翰之先公嘗分刺是邦厖
眉褒衣諸老森立盖嘗極尊賢之禮矣今茲作新亦將
有意夫斯道考問德業吾猶以為有在也周翰名申之
池陽人林君字以道非怠其職以苟度者於是乎見魯

公修宮形於歌頌系以詩曰

維鄆之峯煌煌金精其江縈紆挾城以行磅礴元化孕
茲羣英其英伊何鬱彼瑚璉不戚施以求是則是憲發
其精忠匪石可轉曰尹之來庭誥是遵顧瞻廟廷風墮
雨昏土金丹漆有炳其文宮既完矣失教則缺循循子
佩自今以始罔敢越以道氏林葺構揭揭杜先之訓百
世服膺有失其猷將夸誕是興凡升論堂戰兢以承

清容居士集卷十八

欽定四庫全書

清容居士集卷十九

元 袁桷 撰

記

馬元帥防倭記

自昔待蠻夷之國必傳詔令以諭說之稍失撫馭則狙詐百出甚者嗜錙銖之甘傾接如素所交往失上國體簸侮訕笑於茲有年矣今天子考獻令於疆域中書省

奏曰蠻夷之不庭實守禦長吏餌利忘公弊不可日長
維定海實慶元屬縣附海司鎮遏遵考舊蹟茲其為泊
艤之所舶有定制輸其物以上于官勿入郡城勿止貿
易則得以永遠虛聲生疑駭驛傳騎亡益也是宜選帥
臣清白有譽望者制置其事上可其奏泰定二年冬十
月倭人以舟至海口於是行省僉曰非馬公孰得當是
選公乘驛至縣即宣諭上意始疑駭不肯承命反復申
諭訖如教於是整官軍合四部以一號名列選船以示

備禦戢科調減騶從除征商之姦嚴巡警之實慮民之
投憲為文以諭收其帆櫓器械而舶法卒不敢移減自
便事既畢賈區市虛陳列分錯咿嚶爭竒踏歌轉舞川
后山君德色效靈而公之淵思曲畫若防之制水不可
得以殫述自始訖終凡一百三十有七日古之禦邊莫
踰於諸葛武侯韋臯善繼史有述焉今公創始於前願
後之賢帥規隨以成非惟鄉里之奠安則國家懷來將
自茲始王會之篇楠願有繼焉

兩浙轉運鹽使分司記

國朝定煮海之賦倍於前代邦用是資其選官委任為
不輕兩浙設總司於杭東西屬郡率置分司以董督四
明號為東浙繁夥饑饉荐罹逋負益廣急之則疲繭愁
嘆顰色骨立見於耄稚故受其任者為最難楠官翰林
時預議中書堂嘗白丞相乞減歲額丞相頷其議于時
大臣咸然其說卒以戶部籍不能易是後憂國者迄減
其直繼今善謀邦計之士亦將有以待也泰定元年冬

分司燬三年張侯伯威蒞是邦以官楮若干委于郡郡
守郭侯曰茲役不可緩必擇善於營繕者是屬曰阮君
申之縣庠之興尹能紹之曰尉周君一夔尉解久湮尉
能起之茲其以是屬僉謀曰取於山里胥是刪鬻於市
大賈以喜將視其材市於民堅完縝密是則不負於郭
侯之教矣六月闢工九月告成聽事崇嚴夾舍拱揖門
臺有叙百堵具列斧斤鑿鼓不徹于垣周君則曰尉雖
不才圖圖之設非我職矧轉運府設是則益以病盡去

諸復以楮之餘者歸于司官常患不得其人急奉於公
怨讟滋興况復因之以竊其利周君則不然人皆曰作
之登登周君是承去其榜笞民完以熙若是則任其職
者絕叫囂息追逮其賦寧有不登于天府肯之使者遺
愛揭於堅珉矣後之來者登斯堂也藹然仁政將屢書
不絕楸老矣尚當見之泰定四年二月庚寅具官袁桷
記

鄞縣小溪巡檢司記

城南門折行四十五里曰小溪鎮宋元豐置焉唐曰光
溪鎮以監酒稅煙火得名治平元年罷酒稅以便民獨
掌煙火凡言煙火職民訟水火盜賊其地三境交接大
江貫其中羣溪畢會水清冷如明鏡巖壑擁秀千篙競
發碧瓦朱甍翬聳鱗比望之如神仙居宋紹興中北客
多樂居之魏文節公結圃墅與客大梁張武子為詩友
其它如安儀同孫王尚書相繼卜築而為是鎮者于于
養恬承接履烏爭鬪絕庭下桷幼歲舟至溪上猶能記

髣髴也皇朝一海寓立巡檢司于是地而舊鎮久廢故家亦湮沒毀散仕者率苟循歲月處隘蹕陋不復以崇嚴為事泰定元年白君察罕不花莅是職與父老言曰司徵之所不在荒寂則在獷惡吾獨愛是溪有先賢之遺俗薪者販者前歌後休絕枹鼓之警罷干楸之邏吾心固勤焉亦是土循謹之素願廣聽事以表茲溪咸曰然於是木踵以至甃效以來三年夏闢工九月告成遠迎龍湫近接虹梁舉觴以落而懷牒巧訟者各屏息以

避有合夫道德齊禮之義迺相與歌曰

作之烝烝罔聞其聲養其高明心清以寧不卑其官惟
後來是承

吳江重建長橋記

震澤東受羣川汪洋巨浸至吳江尤廣衍地為南北衝
千帆競發駛風怒濤春擊噴薄一失便利莫能制唐刺史
史王仲舒築石堤以順牽挽宋慶厯八年邑宰李問始
造長橋繇是各捨舟以途來往若織水齧木腐歲一治

葺益為民病泰定元年冬州判官張君顯祖始莅事曰
茲實首政稽工程財莫知攸出當謀於民民有調役維
浮屠善計度長衢廣殿瞬息以具吾語諸其有獲廣濟
僧崇敬寔來敬言伐木為梁弗克支遠易以石其迄有
濟叅知政事馬思忽公以督運至吳迺采其議周詢以
籌首捐貲以勸敬復曰作事謀始不可不慎有善士姚
缺
嘉禾人能任大工役必屈以委繪圖相攸經畫畢
具咸服姚議於是叅政諫郡守郭侯鵬翼役未興丞相

荅刺罕公朝京師迴道繇吳江郡白橋議丞相曰吾必
首倡即捐萬緡而府縣士民相胥以勸平章高公貫公
繇湖廣江西來自江浙力囑張君俾終是工杜侯貞來
守是土亦曰張之言然閏正月建橋明年二月橋成長
一千三百尺有奇捷以巨石下達層淵積石既高環若
半月為梁六十有一釐其剽悍廣中三梁為丈三百以
通巨舟層欄狻猊危柱巖巖甃以文甃過者如席舊有
亭名垂虹周遭窳我因名以增榮觀焉是役也敬師鳩

徒輸財實三之二贏財十萬復以為寶帶橋助姚摠其
綱張君首議出於仁政事有脗合而是州興役見知於
丞相誠出大幸厥今運舟相聯驛使旁午咸曰丞相謀
國經遠張君美績繇是得書將永遠無極繫之以詩曰
茫茫禹甸昔鄰於魚維四載功茲為具區有失其防羣
螫喁喁曰維李侯構茲虹梁經始孔艱任負揚揚歲老
水泐臨履若驚張君莅官飭我初政曰茲橋匪修涉者
益病召彼耆老貨布莫競相國之來六轡徐徐詢事審

宜以究以圖割其緡錢俾民樂輸橋既成矣虹飛于江
千柱承宇羣流迴砥礪兮層城爛其軒窓張君籌思相
國成之彼清淨士式克承之千歲永賴我庸以銘之

陸氏捨田記

吳越舊俗敬事鬼神後千餘年爭崇尚浮屠老子學棟
薨徧郡縣宋帝南渡公卿大臣多出兩浙而制令入政
府得建宮院崇祖禰驅石輦木空巖閭寂之地高下晃
曜財日益耗而弊莫可救矣故稍自給足者亦承風效

施跬步瞬目日不勝其繁吁可禁哉宋社亡故家日降辱過昔所崇建揮手若不相識甚者翦夷其墓田豚蹄之祭不通於君蒿而卒未有能懲戒夫厲階於初其習聞者不變故雖善說巧譬終莫能以改也夫錫山陸元俊以其母夫人楊氏捨田之狀且告曰陸故吳望族大父凱恬靜絕企鵝觀老子書若有得所與交多聞人是生先府君愈孝謹自治讀司馬公書不釋手人勸之仕則曰吾承事於家者未至安能弊內以益外哉未幾大

父母相繼卒吾府君拮据治窀穸不幸以毀卒又不幸
弟鐵孫卒於是吾母曰為物為變魂之屈而不能伸者
也氣化則魂升求於家祭記禮者盡之矣求於窆冥則
莫若清淨焉是依汝父若弟其往也無悔而吾惓惓者
情有盡而哀終身不可以有盡也今將割田若干歸于
城北之洞虛觀以廣其時思吾知守禮者矜其情而曲
許之焉事不永久則吾之志墮當求能文詞者為之傳
其文傳田不復可易矣田不可易則汝父弟與吾志俱

不朽矣其田若是俾余信其言者吾友陽穀李君希哲也希哲於陸母為姻聯善屬文遜於予者求徵以示公也儆其子孫而余前言惓惓復將以儆夫觀中之徒知以興言為可畏也袁桷記

野月觀記

養生說有二焉北祖全真其學首以耐勞苦力耕作故凡居處服食非其所自為不敢享蓬垢疏糲絕憂患慕美人所不堪者能安之調伏攝持將以復其性死生壽

天泊然無繫念駸駸乎竺乾氏之學矣東南師魏伯陽
其傳以不死為宗本於黃帝韜精鍊形御六氣以游夫
萬物之表其壽命益長者謂之仙而所傳確有派繫先
儒深有取焉夫人之所受為命其夭閼戕賊必不能盡
其年過於厚者非自裕也盡性知天踐形以全其正斯
二者俱得之矣天台多羽人居遺跡勝所相望不絕宋
世有大梁趙公宗卿某佐縣黃巖樂而家焉踰二百年
子孫益繁衍詩書孝友簪笏不絕於家乘四世孫與慶

虛中父遜世樂道從北方之學者而慕之志彊氣堅脅
不至席今踰十年矣遂築室委羽山之西北八牖四房
兩翼三楹靚深以明于以坐忘不知寒暑之代謝順其
天年以入於自然者也而名之曰野月焉月猶身也則
而象之者得無侶乎吾按其圖東西仙源南企大有北
顧商丘誠仙人棲息之所境清則神湛嘗聞張平叔產
是州王子晉居桐栢山二人皆以不死傳信盡性可以
至命虛中得至靜之說願取平叔書讀之將見王子而

肅之矣道無異同不偏於一者則盡善楠也行南歸願
踵門請其說尚當賦之至治元年九月四明袁楠記

冲庵記

御史臺都事開封賈君華甫以冲名其居謂袁楠曰為
我敷繹而記之余於易先後天之說精思以求而嘗得
其說焉冲漠無迹易之初也二儀定位其氣果有分哉
是氣也陰陽得之則為日月星辰為河漢為山嶽凝而
瑞於世為甘露為慶雲形而在下四靈連理之應係焉

其於人也受中以生則與天地之未判同也曰生矣氣亦果有分哉曰寂然者初之未始離者也感以應不動乎內者也心君清寧行乎六氣而不沴處乎寒暑而無背則中和者內外之樞紐也昔之聖人言夫上者為道下者為器變通事業允屬夫人若是則全其大和以養吾生休休焉復奚遜焉存誠本乾持敬法坤聖人惓惓致辭焉陰陽之用備矣氣生於無形成於有形聚散反復晝夜不置勗哉勉夫將不能以病矣華甫官京師踰

二十年踐歷清劇其於事物也充然若迎刃與人交謙以善防臧否之色絕顏面而損益高下各有攸當是其養之有素外不能動者矣其名曰冲不幾侶夫華甫竦然曰唯遂為之記

順堂記

大德八年余與天台陳君剛中為翰林屬剛中素簡曠不耐酬接獨其族子萬里裨益俛仰客至能使盡歡禮洽而氣和真翩翩良子弟也家居于台之三台山之下

凡十有一世宋世第科目聲譽序代有其人焉古之言
令族必曰荀陳曰王謝非貴華腴也薰德以為善積小
以為高絕於聲音笑貌篤躬以行者斯近矣萬里三游
京師未嘗不與之言齊家修身察其所養益充厚調官
以歸謂余曰遴築堂以奉吾母兄弟三人而仲弟居于
外今將挽之以歸抑反身而思之我不能和協以至於
是邪則又曰遴其母以妻孥之私若是邪昔之歌常棣
之詩情義之曲盡焉者也而夫子蔽之曰順願則順焉

其殆庶幾矣桷曰天地以順動不順為逆焉亭于辰為
震為孽春秋紀之順天地之經義者孝之本矣陳仲子
喻於槁壤世人行事不若仲子則升斯堂油然以興不
遠而復何憂焉化由身始蓋何病焉為之歌曰

彼山嶺屹孰啓源兮世十有一嗣宗蕃兮木之詵詵本
可分兮謂本可分兮枝曷以存季也孔艱憂心薰兮伯
也鬱陶求于原兮歸來歸來兮我母永歡兮

積慶堂記

往歲朝廷廣錫類之澤於中外繇是執政大臣得追榮
其三世今集賢大學士平章大慈公時為翰林承旨捧
制書告于厥曾暨祖考惕然以思曰嗣子守先緒敬篤
弗敢替陟降帝廷嘉惠日接靡有間茲惟前人寵綏功
我康懿公潛光葆真植德在拱把至安惠公封樹益虔
美陰磅礴蓄久而未振逮先考文敏公則亦旁達秀發
聞譽光灼矣然祿弗稱其報今膺是穹顯居室完好弗
先烈是思曷稱永久遂扁其堂曰積慶有取於坤之文

言如臨如存知所以近天子之光者實有攸自桷也獲
殿次集賢得升公之堂而俾有言焉古之能孝者食息
跬步不忘其本而詩人之推原則亦曰孝孫有慶是皆
其先祖之徂賚夫源深則流長恃而不浚將壅焉以竭
譬之善賈貨殖之積所從來久矣因其饒而日取之用
殆有盡今平章公朝夕承顧問委心微言觸類以感悟
廣文以通導善經達權以天下休戚為己任所陳於上
者外雖不能知觀命名之意若堂焉以構播焉以獲實

崇迺先公之德以垂裕於萬子孫毋怠則凡登斯堂者亦將倣以尊祖河潤九里夫豈徒言乎哉

樂全齋記

真定李君允希微甫故儒家幼慕冲曠閱其游記曰登恒山聆天雞觀出日焉遵太行上王屋山嵩華少室視昔時好奇之士遺蹟鐫刻悲愉怪愕歷歷在目而微福頌語何侈愚也南踰江淮地險不足恃矣震澤禹功能知尊之錢塘故王都囂溥靡習未有改遂窺禹穴望

蓬萊久之歷天台赤城知孫興公司馬承禎肥遯益有
旨武夷九曲其仙者誠然與道統之傳有自矣過九江
審瀟匯之本匡山之截乎長江者非偶然也衡山為南
嶽瀟山望祭抑深疑之氣舒而神完則曰吾於鍾山其
止乎遂日廣松竹桃杏鼎壺几硯之屬予以娛其客且
益以自佚鍾山故衣冠之僑寓也繇晉以南名士居焉
今將居是丘以樂之為何如益展其地曰山房堂曰靜
修齋曰樂全軒曰松風而命其樂全者俾余記余嘗悲

好游之士名足以成矣文足以傳矣而不能全其身蓋其沉恣褻養恃才以肆危機駭浪蹈之而莫知遇事瓦解其悔恨悼惜若無所容其生非若夫子之宋之陳之衛之不遇蓋德以輔名道以喻志捨是則非以自豫也希微生盛明之世居于中州以仕焉若水達于川孰能禦遏今而曰卜居于南土豈託而逃者與余居京師見持政柄者皆善思索位置遇大利害輒執咎不能解而南士以疏遠得免希微之居南夫豈遂其靜退與抑亦

耳目之所接有感而然與遂為之辭曰

顯顯鍾山霸基承兮英光盪摩隱德貞兮泉纚纚兮玉
鈴松摇摇兮翠旌維絜士之定居兮山神憺兮以受令
合正命兮萬化成神無方兮養千齡

竹鳳石屏記

繇開平西南行七百里稍折西北其地有泉如懸簾五
色貫射在昔世祖皇帝名之曰三不刺以其國語志之
也地曠衍均成沙居民鮮少地所宜惟瓜悉發南戍卒

壑樹之瓜絕甘美按燉煌多種瓜沙土疏利根蔓善達
分水無沮洳昔常以江漢人廣其田號會稽其事政相
侶至治元年今天子巡北邊望祭陵寢昭文館學士史
公以屬車從旄旂交章鼓柝傳警頓次之暇則詢其遺
俗千里一色林光野燒絕不接目睫怪石犬牙層獻迭
見遂得一屏若水玉澄澈雲根屹成巖岬雕鏤其上有
叢竹森列旁出一木綠葉密成前隱采鳳迴味導前以
飛五采紛敷不假於琢削而生意屈曲造物有以畀之

者因名之曰竹梧來鳳為圖以紀之余嘗聞地之宜於
五穀者男女必繁夥充斥盡力以食其土若夫絕漠廣
域其寶玉光怪不可名狀而其人類寡鮮得非天地之
氣其凝結者為星辰為河嶽其聖其賢者為君師以長
牧之至於不能以自見者則萃其精明剛絜之質以伏
于荒野一得所遭而其緹襲繅薦又甚於他好豈不幸
哉方今天子寶賢飭躬以孚佑于下民茲石之瑞和氣
之感與抑亦開太平之應以告成于天與史公往在至

元間從大帝出征嘗得二石中空如壘出虛成奏其一具北斗形余嘗聞史公好養生說玉石吾寶視於內者何如也至治三年三月表桷記

曰生堂記

天台道士項君子虛通岐黃書其治病不擇富貧輒肯徒步以往處藥候脉有源委蓋所居鄉有老醫能理傷寒受其說傷寒首經絡未有不通是而能為醫者治所居室名之以曰生且求記於余噫今之醫未嘗不以生

為心也技薄而學淺貿貿然以游人之門恣意剖決遂使夫人之壽夭不得以盡其正命十盖有五六者焉薄人之危剛燥䟽補重其疾以利厚資則凡所謂生者不存於其心矣天地之於品物寒暑代謝日用而不能以知為之君師以正其綱常為之醫以療其疾病是醫之道其贊化育者厥功茂著仁為人心操存動止於醫殆得其全矣余嘗聞道家者言陶弘景增本草飛走蟲魚類例有殺生心此盖誘俗鄙俚之論犧牲養人千萬世

不能以易藝不如古人挾一囊以自行巢氏之說畢具於所挾矯誣滋甚矧有若子前所言者其為醫之禍最速矣子虛氣正而色剛立志不苟視財帛如糞土耐習勞苦師全真之說養心若保赤子其未通者必有以日廣活人愈多仰俯不忤斯其為德也大矣庸俟以紀至治三年九月袁楠記

信州貴溪縣楊林橋記

貴溪環山為縣大溪貫其中支流為楊林秋夏水至奔

潰莫能禦歲病涉焉當淳熙年有僧允懷任其事懷陸
出也象山文安公勉之曰徒枉輿梁觀政之本是則昔
時盛平轉輸供調之勞守令有所不暇及矣考於成周
除成梁道於先王之財賄不用役民之法其無迺因其
隙而用之故不煩於官者良有以也二千年来著律令
者長吏率遵守文具飾傳舍除驛道為急使者所弗至
不復計省民所必趨而顛受其害於是乎有倡義者焉
懼其嗇於財也則復有利益之說焉噫民之所利上所

當興顧其力有不能事與勢實有違者夫豈惟今也哉
龍虎山為老子祖宮其民食其業以遊於襄陝廣蜀歲
幾萬人而江淮復不與道繇楊林咸惴惴焉求於上則
有未及謀於私則曰亦盍思以為永久於是山之道士
曰傳某章某首出資以倡之至茲山者董某曰事宜是
鄉之耆老某亦曰吾等詎坐視遂伐木聚石聳為飛梁
危湍駛流帖俯於履轍之下訖成於至治元年十有一
月明年董君襲常來京師命余以記余讀老子之書曰

修之鄉德迺長又曰儉故能廣刻志繕行則其自貶損者夫豈厚生以自養民困於徭役救之者不能以告于上因令所著而強之將轉散而他往清淨之學不有衛翊其何以為教三君子之志深且遠永詔後之來楊林之橋其何有廢焉

小領水亭記

薛君玄卿自京師歸上清二年矣習靜修德日治其文詞刊落雕飾以求進于道暇日游小領領分為兩側足

以上過者爰業然龍虎山為治所其教行南北故凡驛騎之旁午商賈之輻輳皆本於龍虎而道必繇於小領玄卿坐其旁見行者之至是皆假以憇息良憫其勞貴賤固一等也遂築館于領之西曰崇賢作亭于領之東曰振衣命道人日具茗水承接以休其心昔之善喻者曰夸父逐日而不返今世汲汲然道途者皆夸父也故其捫歷河漢而不憚困阨癘瘴而不懼方其去鄉里辭妻子漠然無惻惻之色其羈窮逆旅饘粥藥餌之不給而

猶曰我有命焉奚以憂至於久勞而思逸若登茲領然者未嘗不心一而念同當是時使愔然有得吾知其絕跡於是途必矣玄卿曰領之東古象山陸文安公講道之地其西為臺山突兀秀峙南為雲林塵湖聖井琵琶諸峯歷歷可數北則潛山之井邑稠密高下雞犬桑柘望之如神仙居吾知夫仕焉而已登茲領也必曰吾不復為人間事矣其善蓄而給足者則曰吾行其少息矣王公貴臣捧香而來于山亦知老子不辱莫先于善退往

來鮮少將見夫青牛白鹿之士倚古松而聽流水登斯
亭也願為之執鞭以俟焉斯可矣遂掇其語而為之文
泰定元年正月壬寅清容居士袁桷記

友恭堂記

余幼居鄉合郡里巷考門閥之高者十居其六七焉先
公撫余首而言曰自主組之日盛而兄弟之虧有不可
勝言者今可稱道惟史忠獻王與汝曾外祖忠宣公白
首若一次則曰余忠惠其季尚書貧無副衣出入互易

貴且死也約同葬尚書之子寺丞不替是道以京秩讓其弟所後子二百年来登顯仕無慮數十姓中外宦簿俱徧歷獨號能盡兄弟道為難蓋其貴盛之極勢軋於相等稍避嫌以退則若無所容其身以為吾才不能以見用者兄弟使然也不再傳而其祖父之所蓄棟積稻聚各私利其美好黨署賓客強凌很勝歲時叙昭穆占對簡略觴豆不設強成禮即退言至是良可哀也又曰吾之事賓州分雖嫡長讓其爵於兄子凡世所慕好吾

一不以問怡色拱立若幼子弟積誠以感遂悔焉而益以親汝以孤子承吾宗何憂焉若有子孫衆多能率我以行則知吾門殆未艾也受其言于今四十余年官集賢日近醫藥命次子瑾來侍久之復還翰林屢謁告以請不得命長子瓘撤舊室之蠹腐構新堂以俟歸書屢至將以盡侍養之道余曰父子異宮兄弟同處古之制也幸有尚書公之堂在可以逸老則斯堂若兄弟居之誠宜遂名曰友恭實取夫先公之遺訓焉夫為公侯之

後得為幸矣恣其私心以泯夫天倫祇隸之所不忍因詩書而成衣冠不幸不勝衣冠而卒泯其詩書則昔之高門今不能一二者其病首在是越公之書在山中而余再世之積實倍焉二子能讀而守之又將見吾諸孫之有成而翁授首之泰定元年月日清容居士記

種德堂記

蔡侯茂先以其先郡侯之狀求銘撫其行事古君子也少間謁余為種德堂記其名實侯崇祖之本意昭揭于

戶冊者集賢大學士郭公安道所篆而歌詠其事以光顯悉余同院之故人也若是則余何敢辭郡侯之樹德蓋不止於誌銘之所紀而因事以詠則宜有取於行實昔人有言陰德猶耳鳴想其平居篤厚廣施於鄉惻然以求其急難御於家也敏其力者貫之不足者周之懼飭躬之未能蚤夜以思則曰所求合乎古未能也蘄正乎有道之士則曰吾所為能盡善邪燭計利害得無嫌邪施於族者洽於肌髓與訓於家者蹈履足以日化與

朝培而夕修望歲焉不求報豐養之以年祝之於子期
之於孫磅礴浸漬斯其為種德之本旨也茂先今為良
二千石其季為太守鸞翥鵠峙羽儀清朝盡忠補過以
先其祖父吾知其曾雲少者謹于里門長者服于王庭
恂恂孝慎日補其未備考其興隆與德良未艾也書曰
率乃祖考之攸行又曰汝克昭乃顯祖願相與勉旃也
亦從是得以有益焉泰定元年冬十月甲子四明袁楠
記

春暉堂記

翰林院都事韓君友謙居京師有年矣往歲築堂以奉其母夫人未幾下世今復名其堂曰春暉示不忘初也命余記其事焉孟子生於戰國距舜之時幾二千餘歲矣而其言終身之慕者則必曰惟舜一人焉耳矣昔日之聖人懼其不能皆然也為之令以教之為之表以勸之而作史者復取其卓異者以彰明之教益詳而行益微吁可嘆也矣孝根於心人之所同繇古而論宜不若

是薄然而缺焉所從來久立其名者良有以也杯圈手
澤存而不察非孝之實吾知夫韓君之升斯堂也鷄鳴
則思其進盥之儀饋食以列則思其嗜好之若初將惕
然而奉之日入而息陳其枕簟闔乎其有聞也故其居
於家也望之而在前思之而若著其處於鄉也身無虧
焉言無擇焉鄉之老者曰韓氏之澤有在矣其先人之
教未忘也立於班朝無有父母兢兢若臨于其側而人
始曰若是者其殆幾於永慕矣吾聞友謙佐治大尹執

禮自持不為苛刻矯亢人安其業而化俗敦教饑渴之於飲食義方之訓有自來矣昔孟氏之子於其罽愁困窮之際始矢於言情之感也友謙仕不離鄉遭世隆平卒取其言感之正也桷也官于朝七稔矣升春暉之堂得無愧乎

賀蘭堂記

靈武李公居錢塘三十年築其第之堂而名曰賀蘭志不忘本也會桷自京師還迺命誌之桷嘗紬書于太史

按賀蘭山在靈武保靜縣西草木青白望之如駁馬然者土音語駁為賀蘭而昔之居是山者復因以為姓在唐天寶時靈武號要衝後卒能以一旅之衆興復舊業至李王有其地天下易代凡九姓獨靈武以十餘州相傳者一百餘年其民沉鷺尚勇土壤沃曠氈酪駝馬給足無凶歉國狹而慮密各以金革相保衛患難垂乏絕不少變精急專一迄能奉其君長益傳愈久則俗愈定太祖皇帝經略西土為武功首靈夏舊地始臣服委質

然猶強節好義策殊勲受上賞者史不絕書李公之仕於江南也常兢兢然惠綏不忍侮其鰥寡而其於浙東也事若有素今所領七郡四為其守矣風俗媿惡皆示諸掌而惓惓思於賀蘭者亦將有以振夫姜藹之習使吳越之土如吾賀蘭者斯可矣古者氏族之別必錫于其土雖遠處他邑其不紊散者因是以有考賀蘭之山承平日滋昔時之草木意其豐茸嘉美當盛于公去鄉里之日而斯堂之封植五采交錯密然成文者心猶以

為賀蘭也食必祭先耕則祭嗇斯須不敢遺其初種德
崇報有開必先以侶以續殆將見之公其以余言為徵
也

沉香石記

唐虞之時曷有玩其耳目哉余讀貢書至青州則有怪
石者焉今文登諸島洲往往掇拾珍怪置几席間物易
得而可喜則雖聖人是誠有所不廢矣浙東括蒼山松
化為石其文理真如松或曰踰千年迺爾人為至靈其

化之不可測也為聖焉為神焉受成而不變者木與石
至積之歲月則貫射於日星磅礴於霜露光怪駭愕充
然黝然為珀為玉有不可悉名者矣嘉穀為莠穡夫憂
之鷹之為鳩橘之為枳其遷之若是則亦美惡在於其
中焉京城田舜舉為大醫院屬治其燕居明絜靚幽得
一石望之如水沉樛結宛轉巖岬刻削薦以文石過者
咸以為海南土產也侶是而非其為怪石也奚以疑故
變至於道君子之所勉子盍慎諸

樂善堂記

雲間繇魏晉以降多文人磅礴秀絜故其言辭幽麗瑰雅喻物形狀無留遁常驚動海宇是其人誠精於言者也或曰其地介海挾江波濤魚龍善噴薄變化人居其中者咸侶之宋世文儒益光顯冠帶相望數十年來習始變舟楫極蠻島奇貨善物往往充上國力事生產廣田侈居擬於王侯而仕者亦爭願食於其土夫事久則變變則迭為乘除因其見聞上之人寧有不遏其萌芽

定其準式者與惟烏溪趙質夫之居於鄉也恂悞以無營恂恂里閭足不踐公府汰其侈華日安於平素其鄉人之不善者避之嘗曰積豪以希富富不能永也積書以教子吾其盡心焉勸之仕不能動苟利於人者誠求之泉石以為腴德充以完嗒然忘世其樂道肥遯焉者歟未幾其子庭芝登進士第人始言曰是殆將復其初矣昔故多文物不幸為大家以財雄是其地氣厚積之使然也趙君不屑意焉於是以儒名抑進之則必以文

顯文與行相須以成余嘗上庭芝之文於殿廷繇是以
求之探源汭流苟不止則其學益粹聲聞之遠無疑矣
庭芝詣門曰嚴君以樂善名堂願有記退而詢諸其往
來遂以行事為之記質夫名宗文大父以積善聞于鄉
樂善之義祖是

亦樂齋記

永嘉陳子敬客京師居城南東隅車輪馬蹄之聲奔激
若雷電大雨泥淖入數尺賈區豕圈叅錯啾唧土俗雜

南北不可辨入子敬門槐陰植幢蓋寒苔斑菊側布疎
密清泉滿洗白雲在戶坐者不欲去去者復再至君蒼
髯抵掌一榻為席顧余而言曰此亦樂齋也高王父宣
撫公受薦史太師太師若高外大父舊家遺德泯然罹
變更漆園吏之意為我終始而言之夸者以愧感者以
喟不幾於道乎桷幼聞長老言君里宅雄甲勝據重樓
疏軒旁薄倒景飛鳥怖而海雲伏也君方少年挾策以
自劬漠然其中若不能一朝處稍壯入太學喜名而益

奇兼葭笑渠之蕭爽招提屠蘇之空絕境寂意冷疾筆
落紙自得於香靄千頃之外望者知非綺紈世子弟而
視窶人子復不相侶何其盛也今一廢不得復廢復坐
刻畫居京師十年無知己力慷慨引助視重垢積戾頑
然持牒爭洗濯不三宿告去君意氣當復摧抑闌茸而
怡然以理勝豈榮觀之肯託焉以自逃者與屢空晏如
榮辱不足以累豆羹見色情怵于內也使向時沉溺自
恣卒遇不遂意宜朝夕弗給又安得為十年計天乎其

成之者至矣噫使果止是耶則亦無以自樂夫強之而不復必巽德以處太夫人春秋高不能自明寧勿歸也少貶以求樂於是乎有在陳子勉乎哉慎交而寡言正車于塗其終能有以直矣

清容居士集卷十九

欽定四庫全書

清容居士集卷二十

元 袁桷 撰

記

邵庵記

雍虞伯生界其居之偏為庵廬焉溫清之隙則怡怡然
飽食以歌宴休于中其廬溫密樸質具粹且深中而虛
之若壁而環若鑑而明樞圜而扉方闔闢以動止其溫

燥也。謁以舒其清焉。其淒厲也。隤以休其和焉。左顧右
矚。神止氣寂。晝握其動。夜根其靜。不巧飾于外。據萬物
之會。將以極其榮觀者焉。廬不廣。尋丈旁。設易圖。圖除
其卦五十有六。瞪而視之。首擊而尾應。迎而存之。風至
而水涌。審聲遺形。益原其情。忽然控浮游以上征。則搏
制控伏。囿于其內。而不能以自恣。或曰。非輕世遠舉者。
不得以專。是伯生曰。維昔邵先遭時。明康玩芳。以嬉不
激。不隨順其隆汙。儒者之準也。吾將尊其廬。曰邵庵。何

如桷曰可乎哉言無郵乎夫敦厚而靈明者君之先也
峻簡而絜精者君之光也自君之出名日以張莫窮其
鄉黽黽然聲音笑貌之學詎昔之志也勉之哉茲廬之
制易而不卑簡而不倚其取諸物非鑠我者也由質以
成禮無踰矣迺觴以祝之介其休明曰烟烟煜煜維道
之門悃悃款款維德之本美哉廬乎足以為永居乎表
桷記

古劔記

吳成季得劔一于故吳之區窮首以度合周尺二十有一寸下縮而圓人盡其握彘倍於臘東西半焉鐔長五寸有奇口懸三空古飾以琤具者金氣消竭玉質湛湛然望其鋒肅而不剌黝乎以溫如鑑之示明揣其章若冰之在防養其寒光泊焉不知所凝日出而觀則陸離以陳為丹為碧起滅於膚理風雨以休之隱隱歷歷欲泄而強抑客曰此何祥也成季曰粵古至人絕世遁逃有不得已則託劔以象五金之精竊陰據陽繇神以成

非劍之能也維吾道祖以劍印授受為漢世遺物傳信
可根據劍歸宣和今得于吳吳為故都庸詎知非昔之
所寶且夫化而沉於淵物之靈也返之於山物之完也
或曰以神不以形又曰以德不以物形與物其果有變
乎表桷記

昭真山水記

廣信昭真山晉王仙居山祖閩武夷宗為天冠巖翼行
數十里左右扈挾悉至觀迺伏北俯貴溪又正北當縣

居中匯泉曰寒月泉與藥池丹井通遵井南鱗瓦削列
成廡有泉懸溜廡下拾級以升曰金沙益南至于昇仙
臺臺石天設空明無依傳言王仙化是又南石室坐可
二十席下視屋邑蟻髮旋縷凡登是山者不盡適不返
故冠以逍遙焉上巘為靈湫逍遙西多故賢居三山品
列徐紹宗隱益下北麓陸文安公書堂奠焉循西有吳
緬石潛谷巖小隱巖皆以處士著吳緬石形成五嶽復
曰五面迤東為峰二曰老人石人東屈而下得名六學

堂以虛名仙足月巖以形名鬼谷以真隱名鬼谷東石
壁中穴環好風出湧泉曰風洞輔東益高有石箕瓢器
物成琢潭深不測以磔潭名又東極下水鉤盤巖壁削
立旌陽許令刺蛟于是唐名曰馨香觀道士祝丹陽繪
圖俾志且言其山清刻深古多異石名木歲不識伏日
泉品與惠山同自唐李商隱劉大用王荊公毛澤民而
下著詠可傳信夫山南為陽主陽賓陰鍾其所極鬱之
而不化可慕可愕不一以足然神獨嗇之使冲漠者專

其靜居絜絜然好游之士少紓其耳目而卒不異何也
世言名山多方外居益以昭真為信丙午二月表楠記

東山精舍記

自民迫於生而儒日益病清宗華門淪圯乘接閭然絕
環珮聲束裝韞衣方偃伏却立而甚者貿貿途路間益
困苦不復振或以謂升降迭運之理使然耳噫首是說
者其未_知所養與予客京師豫章周儀之之甥冷有泰後
先辱共游問其年則宜若與昔不相接近而甚頌其文

子始異之儀之曰不然冷為分寧故族官簿相接所居
曰東山山橫重屏方列若刻其尊正叔治屋一區負山
為居治堂翼然疏沼縈然幽林絜石竒梧秀竹之森爽
以繚以屬前拱而導則黃龍幕阜蜿蜒效焉平臯沃畛
鱗集備焉朝光夕霏戶牖進而几席納也正叔閉門幾
三十年服居士衣設丈席講論終日危坐清思無纖芥
糠粃時為詩詞凌厲頓伏索索裂金石舉觴雅歌耄稚
以叙酬酢揖讓猶昔時衣冠家氣度而卒相邂逅恍然

知為非人間世也嘗聞正舉童子時意功業可拾取今
迺摧落刊實益自斂避彬彬文質久而益彌章焉夫不
急於外者宜有裕於後大江以西士風炳如於是乎則
故予首書其慨然者以屬吾黨知正叔為可徵四明袁
桷記

采芝亭記

太行首於三危伏於河折北而尊為恒山支巒複岡畢
赴於燕秩秩然復纒屬以東數十百里入於海上土人

以其西來號曰西山或曰駿極于是山急而堅凝地多
空寒不可以兆域又曰是為都城之衝自北而南太和
薰然捨是奚所適於是工部尚書郝公景文惕然維思
實震且陰迺相其大塋先君子之藏祔陞而善崩始遷
而謀焉大德甲辰得卜於某山卜者曰是山之形翼容
而味鳴日中而升戴坎以寧以華以承及既塋明年守
冢以芝告公弗信展于墓下登坡而望則數者萑者燧
然于山效獻以萬歸以示其客袁桷噫是果為芝邪今

舉世之言瑞者必首於芝芝不常有於世故窮夸闡珍得一二焉輒指以自瑞使誠瑞邪寸畛尺壑其融液變化不若是之固而甚者竭四海之類夫芝者聚焉以觀不亦陋乎夫土和則芝生始公之心懼親之不寧故擇其溫密以永其幽菌蠢而擢靈土之和也盈數為萬非昔之固也不侈以求異德之質也維山之陽彌鞏彌剛子孫之祥也孝感而文著於瑞乎何有

梅亭記

廣信據江浙閩越之衝萬山交牙四顧羅劒戟其氣蜿

蜓磅礴為丹碧玉石長溪貫其中凝膏溢藍愈積愈完山水
之秀甲諸郡故其俗多刻厲自奮矜謹節義言文學道
德者為儒宗治政事者為吏師建炎初中原縉紳家多
居是州其舊聞遺語尊守傳信歷歷可數皆數百年文
獻源委非如野人窶子掇拾目近為利祿地方是時人
物之勝足以甲山水而浮屠老氏之跡實不與焉弋陽
為縣山益深水益清車輪馬足之聲不入于其境寒泉
蒼巖百里一色山之陽有陳隱君居焉隱君守儒以自

信閉門授書朝夕盥饋合其孫曾嬪婦男女將百人年九十四以終有子曰德父教授帶湖十年法當得致仕官以鄉博士歸于家迺築室旁近之華山為雲居雲居之西為梅亭曰香月於是其子敏學志仲官京師俾子記之且言曰自吾大父恂恂之於是居也詩書以持稼穡以時門無忿色而少長以叙吾不知其化之及於里也自吾父觀之今七十餘矣誦聲滿戶而樽箏在牖氣完而色康其行舒舒其語徐徐視吾祖之孫曾亦相適

也噫榮何以過是袁桷曰天地之理嗇者豐之始周流于六虛其暗也實明其闢也實闔昔之澹然而無營者德之基也養之于其身而施之于其後充以引之吾知其孝謹於家者日益廣爵祿於朝者日益侈視斯亭之手植豐融婆婆連理而並實陰陽之生物其不出於是明矣詩曰高山仰止景行行止亦因以勉夫志仲焉

西泉記

高君舜臣通敏才智之士也治其齋心之居表其顏曰

西泉為予言曰太行之山合于恒山隱伏聯亘北東以入于海肅慎朝鮮屹然表于其地者皆支絡也泉生於西歸於東陰陽之常性也周人有言曰肅慎燕亳吾北土也昔之疆理吾於是乎考則凡北紀之山水繇西徂東所繇來審矣為我記之舜臣於金為大姓官簿歷歷可紀居京師數世遡其泉源知其晝夜之不止必達于其里禮不忘其本其高君之謂與予官京師踰十餘年望所謂西山者蒼拔翠峭實大行之苗裔水流無窮演

延洋溢導之為漕渠止之為陂塘資國用以為民食者
泉之利也其次達官貴人因之以丘壟濬其冽清挹其
回環蔭藉蕃庶將利其子孫以求全乎茲山之下不知
其幾至於淡泊空曠之士則又扶尋幽深澹膏匯甘使
夫絕塵稅駕者止焉以嗟嘷焉以留無有窮已噫西泉
之效誠博矣哉在易之象曰山下出泉蒙其險釋矣謹
其所之君子之用也高君致用以推本厥旨明矣究反
復之道益驗於身將見其百折而不撓獨行而不懼非

茲泉也與念其祖德繫命名之意與其兄堯臣閉門窮經沉思篤行予得與之交將並游夫西山感夫昔之廢興不在於險則泉之東其寧有已邪

顛庵記

慈溪黃彥實少喜豪士漫游故都見世所稱知名人率脂韋自保秘惋恨無可與語酒酣氣雄謂海寓方宴安休明宜取天下事置念慮以入計畫否則搜抉險幽浩然為萬里游遇不遇命也未幾泝采石上漢江西游荆

襄歷觀用武關要荒榛廢壘猶有能言昔時得失益慷
慨自振而所見公卿大夫與夫布衣之士則皆與昔交
游者無大異於是治其居曰懃庵以自儆求記於予亟
請焉昔之養生者志專而若愚遺世絕俗懼其名之至
也介然以逃泊然以遨聖人憂之慮其器之不弘不足
以任斯道也然舉世之士樂同而惡異曲者常安直者
易危則寧直焉者斯近矣彥實智通於事物行幾於古
人視今世之懃者吾能言之草野游京師決臆裂背不

顧生死詣廟堂求奇中書未出袖而利祿萌於中非慙也鄉里稱任俠大言斷是否陰持短長以利己非慙也佯不絜清詆罵排觸而私有揣摩問之而若撲即之而彌汙若是者又其侶而靡者也彥實先大夫文節先生為史館官咸淳上殿論浮屠不宜入禁掖度宗大怒手詔出國門未幾貳守桐江與宰相兄子爭事卒易他郡慙無以易此矣古之君子事至而名隨人棄我取自謙之道也聞彥實居山中閉門讀書益不妄交求古聖賢

摧折困踣之本發而不可犯者養之至也予歸里聆其
言斯知之矣延祐五年夏四月越袁楠記

桂山堂記

江南地宜桂故凡廣居室者必植之以為美觀焉釋木
者曰桂白華叢生冬夏常青人取以自近良有以也地
記言八公從淮南王後入山為仙作叢桂詞與漢史所
記異予獨愛其簡潔幽古為文章宗師申言攀援非自
息於林莽者讀其辭可悲也矣上饒周君缺居龍虎

山因其地之隆植桂于上築堂面之而名曰桂山徵記
於予予曰今龍虎山為道家統宗金碧晃曜出于縣官
搜奇挾幽異夫昔時之荒煙古木軫相結而袂相接也
周君主畫諾以極其榮觀則今之所命名者若不相似
何也然予嘗聞之至人其貌恂恂其言諄諄執中以權
損益其未備黜紛華以從事于寂寞者非有所激也周
君知周於身謙抑自持思夫山林之靜養其冲泊先事
以自警古之所謂備豫而能立者近之矣周氏之先得

道於希夷陳先生當熙寧時猶亡恙見其曾玄離世樂
善樹德之訓有自來矣且夫託物以喻志詩人之心也
仰觀於山徐視吾手植者風雨冰雪貫四時而不改擬
諸形容得無似之乎異日將游山中詠八公之辭反招
寫心僕援筆未敢以老為辭也

張尚書救荒後記

儒學提舉天台柯謙自牧為序一通言今工部尚書張
公之佐江浙也活饑民褫貪帥為去思帥能歌詩者追

美之是可謂無負張公矣往歲桷以翰苑屬歸里人
言元帥府始治嫠女有摠戎官鎮慶元言慶元聯蠻國
入海最近稍失控御兵釁不可測乘驛入都白利害時
太傳承相坐省中盛言摠戎非兼元帥不足以重鎮太
傳察其言有私便後雖移鎮而卒用常調官如舊制焉
大德十一年歲大饑浙東副帥缺命屬吏疾傳詣行
省告變曰慶元接海口僅數十里羣盜據島嶼出沒將
入城剽劫願速分行省軍往翦其窟穴緩則不可治行

省大驚將如議張公時為郎中丞相謂公曰計安出公以調兵非所預丞相固問則曰果有變帥府當印署白省副帥獨遣非完議也召屬吏問變奚自府有鎮守官今上變為何地屬吏頰首不能對遂移檄問盜今安在帥府得檄大驚咸言無是事繇是卒不發兵而慶元迄無它噫方副帥造謀時當饑侵窮困之急稍加以兵山海通竄寧能斂手以快鋒鏑一有抗拒誣以叛逆則凡故家大姓蔓延於囹圄之下將不可勝計人能知救荒

之為美績而不知吾里之人微張公之言有不待賑恤而皆置死地矣敢書以補郡乘俾知夫立帥府本末蓋如是張公名缺字士瞻衛郡人處事明遠知大體若是事寧勿為記其可乎

晚香堂記

延陵吳成季父奉萬年之祝于崇真大德甲辰二月承詔為祠官于衡山復命歸祠其受道之山曰龍虎龍虎於番為接壤番於成季為鄉井於是其嚴君偕七十矣

迺避館屏駟却入里閭舉觴再拜以祝以壽宗黨姻友
旁列叙坐勸酬以禮進退維度聚而言曰嘻其盛哉成
季曰不然緊昔遠祖挈國以讓晚交兵間既壽且康至
于番君墜緒呂興維用之嗇報必以厚自吾少時聞為
是州一不承意則交喙爭誚而吾父子吟詠佔畢訥訥
謙讓不能出諸口至論成敗衰盛嘗掩卷三歎以自警
厲而今也二老人康強起居佐理內外冠帶童丱咸立
左右其迨乎遠祖之意願築堂以奉而名曰晚香其何

如衆曰唯唯未幾來京師屢屬予以記予以謂大夫士之養莫侈於羊豕而世之希年遠引者至以金石草木為可久菊水之壽效極於胡廣昔之議廣猶若糞土則名與年較不相並今成季榮於其身顯於其親惓惓然企本支之盛吾見吳氏子孫孝謹遜于里門秀敏有列于朝而耆耄老人方遊遨嬉戲擊鮮養醲若古之所謂偕老而終隱者其不在茲也傳記言王公大人晚歲託言神仙多以遠禍成李游乎方外之畛憂世嫉邪嘗

不自置異時承渥流問則司馬子微之對殆猶糠粃而
名以晚香者非獨為吳氏美是特有待於成季也四明
袁桷記

玉冠記

大德乙巳歲二月甲申皇帝受釐于玉德迺命尚服出
玉冠以賜玄教真人張公其製為山形空其梁述溫栗
精潤隆殺悉等莫有究攸始袁桷見之曰此紹興宴居
所服韜髮冠也舊聞長老言思陵為清暑樓聚金石奇

刻飛湍清樾森鬱蕭爽伏日退朝衣白縠羽衣冠小玉冠閱定書蹟其殆是與維古弁冕雜飾以玉至晉宋間君臣上下崇習玄理清逸修簡始為玉冠今世所傳元帝像及晉賢圖軸與此無毫髮異則紹興所冠猶古帝王遺物按道家書言神君始建飛天玉冠其製與遠游爵弁微近疑有差等含玄秉陽舒精吐光繫冠維則欽承是天寵進道之篤其不在茲乎夫王者陽中之陰也首者體形之上神精明之主也陽非陰不能以成合而

凝之出入于斯易之門也方今張公以清淨理贊益熙
洽縝密而不露孚尹而不泄遠而望之誠理勝矣庸述
其始以示于後袁楠謹記

孝思亭記

三山吳明之築亭於陽岡大父之墓側名之曰孝思按
昔之言禮者則曰魂歸于所居將致其一焉墓有祭有
亭為非古矣善乎延陵季子之言曰魂氣無不之也夫
專于祠宇不意若是拘也物精神著其氣發揚者出于

丘壟是則必首於墓將奚以疑古之聖人懼其瀆且數也嚴為之防速貧速朽夫豈非夫子之語祭墓為尸是墓有祭矣祭而不屋失祭之禮矣繇宋宰輔侈其墓田不復拘甲令層樓巍閣空青金碧歸然于坡陀之阜過者必式其防過森竦誠以為千百年無慮也乾坤合運頽垣廢址上牛羊而履荆棘欲求子孫不可得而明之方慎其繚圍構亭以綏其體魄是則過於盛者必有衰吳君之志追遠以求旨微意深鬱勃之興將自茲始大

舜五十而慕昔以為難能也邇而推之探其微旨亦難能也禮抱孫不抱子祔于王父幽明之通瞭然而莫遺明之審之而克行之楠也故國之公孫其思于祖父也罔敢替因繹其旨為之記

福源精舍記

建炎初秉義李君以勇略捍衛鄉社倜儻急義植德流行諸孫以詩學接武科目恂恂退讓望知為秉義家子弟衣冠浸微獨漂水府君之子登仕君寄隱廛市龐眉

幅巾治生產益有理年逾七十迺卒予請告歸里其子
印傳以事狀踵門求記其精舍俾永遠嘉熙間漂水君
卒于縣治登仕甫八歲祖母朱氏奉其喪以歸將葬于
上元之祖塋朱母泣然曰孤兒奚依少不利必隳其先
祀相于慈溪東嶺楊輿之山卜告以吉結為四塋昭穆
以叙而以其殤女祔于旁近登仕長有室曰茹氏朱母
即世既葬茹氏曰吾姑以橐中裘成是山夫君獲有成
立新婦不淑紹先繼志弗展擴則奚以緝前人光亦斥

奩資廣山壟建祠屋精舍以奉其舅姑茹氏沒于至元
之十九年登仕君沒于至大之四年大德六年印傳與
其妻胡氏同入山拜墓顧瞻周迴蕪圯日廣胡氏曰再
世尊章有成妾獨不能少效萬一聞佛氏有大報恩而
用其法名為福源精舍命僧以居遂一以浮屠所需者
咸備具復買田若干命僧某首主俾其弟子相次以繼
其所度僧非李氏不得入予愕而言曰吾里卿相什百
各以功德院為請有以其田園與子孫共分析求利益

穹樓矗塔坡阜松柏蔽翳綿數十里時運更易各降在
皂隸孤童負囊偃偃不能以入每恨其祖父作是為無
益也予嘗過其祠宇薪草雜糅破凝爐煤而主茲所者
憫然有曰彼昔承寵恩故幸若是其子孫何能預至于
士夫之家庵廬相接幸其不為有司之所隸羣聚毀撤
甚者發其丘壟噫可勝道哉予謂三孝婦之志人莫能
並心純而孝專發於自然非過信以溺于異端思其創
始思其悠久是則秉義之澤良未艾也為浮屠者聞予

之說寧不有泚其顙印傳復為穴三一以葬生母張氏
其二則夫婦因以預備云

治平寺記

治平寺主者以建寺本末謁予為記其狀曰寺在城南
門外渡江曰銅湓浦鄉曰鄆塘平曠鬱密松竹環植望
之竦然其間者即治平也寺建於後唐清泰僧曰道隆
以法華勸民習誦持善果初是地三十畝有奇始居之
復得別業為畝六十其初曰東李浦院錢忠懿王俶給

符牒俾永遠又改為保豐院宋英宗更元治平祀明堂
始易今名法智大師以教乘闡東南習學皆其徒故號
為天台宗元豐間有性法師講法華別立機要從者雲
集而田租漸廣居民染瘴下疾師呪水飲之飲者日益
衆師呪於池悉愈寺舊有東西池今呪水池猶甘冽可
鑑師號山堂卒葬於是寺嘉熙三年寺燬于時上師實
主是寺遂新三門法堂廊廡等若干迺謝去淳祐六年
堯師始成殿宇居室所宜有者悉備咸淳八年子直良

法師至曰吾不可不私淑後學戶屢日接簡約暢隱法華之說大備而治平名益著率由是陞于南湖者凡數人南湖四明之祖庭也後曰一蓀守是山今十有五年繫前修是承昔之營構皆腐折傾漏不可支今幸完復粗備惟創建昔人缺軼靡有紀願登其事于石楠以為今之為牧守者苟度歲月堤防津梁田野之不治尚何能望究其本始為世胄者日隳其先祖父名諱近在數十年間有不能答未有如浮圖氏泝源推根若是之詳

者道散於九流百家各自奮植吾儒之教末俗以空言
為高卒不能勝甚者去其舊籍郡縣養士之田皆漫漶
不可考如蔣師所為寧不有愧庸因其狀以紀亦以勵
吾徒之為師長者云

海會庵記

出城西門皆良田白水高下綠樹雞犬相聞翕然農家
善於業者也予繇京師回艤舟驛亭望之則朱甍碧瓦
傑然為人天居佛之道以枯槁堅忍為能事卉衣糲食

樹下塚間不求其豐足故從者樂然如歸二千餘年為之說者以莊嚴為善果愚者益信狂者益怖而梵宮寶刹合郡縣山水之勝悉為所據日增月益有不可勝言者四明海之東絕處為補陀巖大士顯焉鄞之東為育王山釋迦舍利塔焉遵南為岳林為天台皆游歷之所而補陀育王自天子至於王公百司乘驛奉香幣不絕於道四方之民終歲膜拜至於西門始求其渡海之路然而觸風濤煙霧率莫悉處所又舟人伺其危殆時有

不利目接其事而來者益不止豈非其教足以傾動而為善者有以復其良心也有僧曰妙壽以其建庵之始末告曰茲庵之創專以奉補陀育王岳林天台之游者也初卜地於城西郡民任氏首不過地千步屋三楹有同志僧妙然日習宗尚善勸募傾捨駢集又有僧元安清持以行業振勵信者俱至善士翁父堅翼輔之首建佛宮且割田以濟未幾宣慰楊侯梓益買田以贊相由是拓地為畝十五屋百楹殿堂門廡迎賓習靜各有其

地泛海有舟放生有池獨不設方丈懼後人之佚樂以
自恣也不請寺額曰海會庵懼其奪攘以為茲所之凌
替也其狀若是願請記以求永久予曰博施濟衆昔之
聖人猶以為慊浮屠氏日丐假於外而皆足以慰其志
意蓋其說汪洋浩博參之以報應而為惡者懼吾儒之
說百姓日用而不知卒之以道政齊刑者不得已之具
逃空虛絕人事釋氏本旨而其生產作業皆取於吾教
若今有司興繕則民不勝怨咨海會之成相胥以勸何

其易也妙壽深湛善思事為之防曲為之制其惓惓于後者厥慮若是雖欲勿永久其得勿永久乎

重建延福院記

予繇集賢還里居有僧永華躡屨重趼踰數千里南康來介天平恩太師求記延福院興造者其狀曰院在南康建昌州西山曰龍城唐馬大師嘗憩寂焉殿有記宋雍熙間廣陵沙門處暹所撰歲久蕪圯宋末郡始署開陽院僧紹志主之墾殖磨刮集材庀工鍾閣齋室凡僧

之所居處者咸屹然以成至大德庚子主茲山三十餘
年矣命其徒曰吾宜藏密以興造事付汝等咸頓首曰
曷敢不承繼曰繼福迺襲院事首建三門及外門曰繼
祖繼壽永翌廣賓至之所視昔居處之宜益廓且完繼
祐迺曰吾新殿視瞻廣博謂色身小大擬於形容良非
吾道然偏滿充塞當有是事揆諸空幻則非實相宜改
而正諸遂易舊象得舍利五色於佛胷背間宋咸平僧
道志所建或曰是若有脗合然者歟於是梵唄贊頌而

若子若孫皆勇猛赴事謁於事佛之徒增飾金紺象設
尊重瓶鉢精潔烜然如人天居復增其田若干紹志終
于大德七年壽七十五葬寺東之陽令守其遺言祖子
孫相繼如初孫七人曰永岫永豈永斲永華宗松宗槐
宗權讀狀畢迺問華曰志師能植立若是宜有本始華
拱手曰昔圓悟大師得法弟子曰真牧大師賢賢度其
徒幾千人志其派緒也予嘗聞釋氏服勤壞形實本持
攝至於廣居榮觀將以懾伏庸駸除其侈心非專以是

為能事生而不居死而不餘故其道益固傳有言曰又何加焉曰教之能仁之教書遍中國為禪學者不立文字而其徒復守師說文字益繁今而曰教之於二者將焉取乎哉他年曳杖游匡廬西游龍城問聰明道理其必有以告我則予之記興建亦得以永久也

資教寺修三門記

吾里法智大師以至行約言闡揚天台大行于浙東西謂城南延慶為祖庭故四明旁邑近郊雖丈室尋地多

博辯秀出之徒過於他郡西山資教其一也西山在郡西四十里周顯德元年號廣德院宋治平改曰資教負山面湖有菱荷鳬鷗舟楫亭橋之勝凡郡人之游于湖者必至是寺湖湮為田游者不復至而寺漸頽圯紹定中月公首授徒是山後謝事上竺願復領之世言上竺第一院西山號最卑繇月公再居而寺益重故講說者爭趨之延祐^缺年道師逢原以郡選主之其徒亦曰彼學專靜選不可易也予舟過先墓必望所謂資教者焉

空巖傾欹樹木翦落將不堪其居比還里則昔之頽然
以興重簷翬飛表表出林杪道師曰吾首新三門餘以
次繕治不田以食廢其教將有愧集徒講肄則庶幾希
前人光三門紀修願以囑焉考諸禮經制有五門雉門
居中故曰三門秦漢損益不遵於周連門為三唯王宮
得用官署降殺非雉門之制久矣釋老宮室擬於乘輿
雖儀制有令不得禁天台以明靜為宗弊衣惡食脫氛
垢厭榮觀汲汲以土木為急崇信興敬將於是乎取夫

像設之教首于西方其能傾動禍福必召募焉以集事
師謝不肯寺久廢得人焉以興則吾徒之為校官者竊
食自嬉寧得無愧焉

吉祥寺重建記

主吉祥寺崇柏師以其興造本末為狀一通俾予為記
其狀曰初寺在翁洲南香柏巖唐有僧慧超相攸築居
峻絜厲行居民傾信寺遂以成漢乾祐中賜額曰崇福
至宋咸平有真大師善持咒能愈閭巷疾病號真大悲

崇奉益廣邑中尉曰丁漸以柏巖峻絕因登陟易於廣
平環以九峰繚以清溪審勢辨方各當其職宋治平始
賜今額曰吉祥紹興中給事中黃龜年以讜論忤時宰
避禍絕人事僑居絕島獨與方外交每至寺中時有宏
智覺禪師主天童宣密挾妙師表叢林其大弟子輝主
是山傾動島嶼黃公敬之施所藏辟支佛牙為閣以度
而寺益增重遂為海上寺居甲乙人稱之為小天童繇
輝師始也皇慶二年火一師始作法堂會遷它所不果

終至是柏居之首建大殿三門次以藏室僧堂凡僧居之所宜營繕者畢具奉定三年告成俗姓虞氏其父酉發嘗為海運官有兄曰庭桂曰庭芝慨然曰吾不可不相吾弟三世佛像吾與弟共成之今夫浮屠氏宮室率為禍福說以誘民陰奪其財民日以耗有國者憂之若師所就不丐假於外竭其贏餘以復舊觀怡愉相資將瘁躬以究築凌陰廣腴田以為後人補緝費志專念遠是果能興其教者也余誌釋氏建置每有感於學校若

是則又重有所感也師居淨慈嗣法於慧禪師屏外持
攝慧之學益有光矣勉之哉

妙果寺記

廬山東林寺以遠法師為祖庭其教行乎海寓閱年滋
多厖幻雜糅壞宮夷址將絕其遺教寺僧普度慨然興
復率弟子十人芒屨草服詣京上書演為萬言又集歷
代經社緣起作蓮宗寶鑑十卷仁宗在東宮閱其書盡
初帙問曰得無欲布施乎合指謝不敢又問曰得無欲

補僧職乎復謝無是想惟蓮教墜絕願殿下振復時武
宗皇帝在御近臣以其事奏即以詔旨慰撫如律令至
大十四年始播告中外而度俾職其教為優曇王師丹
陽人在縣為竹林山妙果寺率徒喻俗將大廣其居以
稱聖天子崇重之意予嘗謂象無形儀域無遠邇遠公
之言曰思專想寂三昧之本彼所謂邦國之殊異相好
之莊嚴蓋將絕其邪惑一淡泊而無所逢大雄氏設喻
警蒙攝持示境境由心發境滅返真清淨安樂包括宇

宙是知道者又安有四履之分別哉度師博習教乘示
於衆者煩焉以導其師日禪師久居東林後主天童嘗
率善士修遠公法來於江西者踵不絕度師興其教是
果能有傳也記寺興造撫其綱要以明初志云

石夫人廟記

州東北隅有山昂然以尊秀特瑰異望之若貞女獨立
凜乎莫能犯水旱祈祭輒應土人因其形侶而名之曰
夫人山唐咸通八年主簿李成矩記其廟貞固之封見

於祠部嘉定十七年加昭德順應咸淳六年加福祐皇
元合一郡縣大修祀典茲山必預焉泰定三年州判官
張思訥奉命致祭肅瞻廟庭棟壓瓴圮心駭目瞪折旋
冥思喟然有言其何以稱上命遂謀於州尹曰蘇君

缺

同知焦君鼎州判官塔海復語其僚俎毅許禋割資以
佐工役而凡隸於祠下者胥勸相事是歲廟成乞記於
楠原夫宓妃靜波神女行雲此騷人墨客之寄興也二
孤望夫至今游覽者羞言之若夫天姥雲母穹窿磊落

淫言鄙語不能以入是則茲山之靈功在水旱餘災以
議傳曰山澤通氣記禮者曰地秉陰竅于山川炳靈赫
奕民社是依崧高之詩實有考焉遂作迎享送神詞詞
曰

磅礴兮上征淦兮積兮縞繒膠木矗兮翠旌恍綏顧兮
揚靈抱貞固兮合窈冥竒功教兮集鏤膝墮兮稜稜駿
兮烝烝帝祀兮永承其來兮弗趾去兮莫視有穰兮

億秭祓不祥兮盪厲密石兮牲繫俛精思兮帝制百神

擁兮森衛苾芬歆兮歲歲

其二

信州自鳴山加封記

至元十四年玄教大宗師張留孫扈從世祖皇帝于兩京言信州自鳴山神有靈狀敢詣闕下敕禮官崇顯之是歲皇帝命侍臣李衆劉子中降香實銀奩旂以金錦顯其神三十一年成宗皇帝有詔遣使致祭嶽瀆在昔登載者如式崇奉大德三年三十八代天師張缺平錢塘潮言神以雲雨昭著自鳴山事見郡乘宋元符始

有廟號繇宣和迄咸淳制書凡十五下乞如今皇帝詔
令於是符于州考證無異辭至大三年立教嗣師崇文
弘道真人吳全節乃言曰吾徒食茲山有年矣闔闢摩
盪繫陰陽是資變以行神神繇以興今天子裡奉祠祭
吾教益昌自鳴於龍虎封畛相入捨是其何言遂復請
于封為明仁廣孝翊化真君桷待罪翰林十有五年矣
嗣師曰龍虎紀述吾不以累子茲山旂蠻紹定之際先
正肅公嘗紀之矣子誠不得辭嘗聞之地秉陰山川竅

焉通而後能鳴石之徵也聲生於空因山以著昧其初而以為神者其諸異乎石之鳴也風霆流形神始出焉神非妄也茲道之妙老氏深知之矣予何敢語延祐三年四月會稽袁桷記

隱仙記

宋開慶初伯父賓州我先考郡公將除夫大父尚書公喪相與議曰宗親報本唯躬行是先君蒿悽愴鬱然而莫能見者將導達之則屈伸之義足以考聞諸老氏有

黃錄齋善攝度彼果能濟則吾父將超然于物表非崇
泥以求福也齋既成以尚書公所遺祠部牒度道士三
人王君德華在是選二人皆亡化不復紀獨王君服道
士服幾七十年往來袁氏門且五世貴歛後盛嘗親見
之至枯泊頽瀟則過門風雨不少阻且曰吾寧負袁門
哉其於宜所學者曰章奏符籙雨暘疾疫親究而遠扣
方外士來質衣以請百誑不倦以其勤且無悔故有所
成就今年八十有八而請者益勤迺語予曰今卜藏于

城西隅名之曰隱仙仙也者返真之義也魂升魄歸死生之大義也而釋仙者謂為不死古果有是若吾徒者寧能企是哉楠今年六十有一矣考其入道先於吾生死者若蜉蝣生者若稊稗推一門之盛衰足以驗一郡之興廢而楠也以謏薄之技獲官清朝今仕焉而止願與王君考游歷之舊指其歸藏則曰委順觀化寧有怛於心懼後人不能以紹志俾預書平昔之出處且以勵于後今主焚修于玄妙聰明不衰壽益未艾家世定海

縣自號曰蓬山志不忘初也泰定三年四月甲午見一居士表摘記


通玄觀賈道士記

通玄觀道士賈志福年八十三化于其居有徒曰王道深者言曰吾師以不言為宗其學澄寂寡約不為翕翕詭幻楮衣草履寒暑自得有問其道者不以對機藏籥啓指喻微密若口授而耳屬也始為汝南民弱冠得法於棲雲王真人王曰知者不言子游四方能果不言以

自全乎後游南陽遇軍帥脅以語不對復辱以箠擾師
正色畫地作無語二字軍帥竦愧謝以白金將築室奉
之會得間走京兆復遇其師曰汝志已完忍辱易忍寵
難其居京師以觀子之有成於是迄歸於京師會有數
薦于先朝者復即遁去然居遁玄而號清靜散人實洞
明祁公之所強也又曰師少時嘗得奇疾夢一老人授
以七桃食之寤而愈其徵家為道士者凡七人有弟曰德
常亦守其學今居大名之獄祠韜靜完絜與吾師無異

願有述以廣其道迺為之詞曰

緊摩兜韃厥機孔艱維柱下學知者不言納息于踵養
神于淵匪曰不言其道已完道豈文傳文實累智虛
辭借浮一跌千里竊陰據陽詭立名字夸者逐魂固者
死技賸此嗒然奧密是造不懈其躬不喪其寶心焉死
灰頭若蓬葆藏明委順是曰至道翩翩二難孰去孰存
厥徒允從匪私其溫恍焉松聲彼聽莫聞勵爾後人永
矢勿諉



清容居士集卷二十